

դառնում էր փորէկէնդան, երբ մեծն ու փոքրը մի քանի անգամ օրվա մեջ որ-
չափ կարելի է կուշտ ուտում էին, ժամերն անց էին կացնում ամեն հոգսից,
ազատ, ուրախ, ամեն աշխատանք թողած: Երեսխաները՝ ձնագնդի ու վեգ,
երիտասարդները՝ լախտի, ձիարշավ ու հրացանաձգութուն, աղջիկներն ու
հարսները՝ կրպարալախտի²⁷, սախկալները՝ գյուղի մեծերը՝ կրղէնգի²⁸ էին
խաղում: Այս խաղերից մի մասն անշուշտ մնացորդ է այն նախնական մագիկ
միջոցների, որով շատ վաղ ժամանակներում կամենում էին արագացնել բնու-
թյան ուրախ հարուստները:

Ամեն տեղ խաղ ու պար, խրվիկ տալ՝ առավոտից մինչև կեսգիշեր թե՛
կանանց և թե՛ տղամարդկանց ջոկ-ջոկ ընկերական բեֆ: Ամեն մասնակից բե-
րում էր այդ բեֆին մեկ մրքաբա բրինձ, մի բաժակ յուղ, մեկ շիշ գինի, շորս
ձու, լավաշ և այլ մթերք—մրցայալ խնջույքին մասնակցելու համար: Թեև այլ
անգամներն էլ կարելի էր խրվիկ տալ, սակայն, խրվիկի բուն օրը Բաբեկեն-
դանի կիրակի օրն էր:

Այդ բուն Բարեկենդանի օրը սարքվում էր նաև Փաշա²⁹, Իշխան, Խան³⁰
խաղը³¹: Երիտասարդներն ընտրում էին իրենց միջից սրամիտ ու սրախոս մե-
կին, հագցնում էին գուլնգուլուն շորեր, գլխին դնում էին ծակած բրուանի՝
դղում կամ շուռ տված հնացած փափախ, կպցնում էին այժի մազից երկաբ
բեղեր ու մորուք, երբեմն կովի պոչ, կողքից՝ կապում էին որպես գարբա՝
վառողաման, ձիու կարկաժ, առջևից՝ փայտե գօճղա՝ երկար թուր, մեջքին՝ մի
հին ժանգոտած շախմախի թվանգ՝ հրացան, կրծքին՝ զանազան ոսկորներ և
խեցիներ որպես շքանշաններ: Նստեցնում էին իյարած՝ թամբած էշի վրա-
երեսով դեպի պոչը: Մի ծառա բռնում էր էշի պոչից, մյուսը՝ ջլավից, մինն էլ
գնում էր կողքից և կանգնած ժամանակ սանրում էր Իշխանի, Փաշայի, խանի
մորուքը: Փաշայի բերանը դնում էին երկար շիրուխ՝ բարակ ձող, որի ծայրին
ամրացած էր լինում շան կամ կատվի գանգը՝ ծակը վեր դարձրած. այդ ծակը
լցնում էին էշի աղբով՝ փէյինավ, վրան ահագին կտոր ածուխ: Ոտներին հագ-
ցրնում էին պատված կոշիկներ՝ ամեն տեսակ պարանի կտորներով կապկը-
պած: Մի քանի մարդ յաստուկներ՝ պահապաններ, փայտե սրերով և կոտրած
շախմախի հրացաններով զինված՝ շրջապատում էին Իշխանին, Փաշային:
Ծառաներից մեկը ներկայացնում էր գրագրին՝ միրգային, որը մի մեծ շա-
քարե թղթից պատրաստած դավթարի՝ մատյանի մեջ ահագին ոսկորի կտորով

²⁷ Կրպարալախտի—կարպետով լախտի խաղում են այսպես. երկու խումբ տղաներ կամ
աղջիկներ հինգ-հինգ, յոթ-յոթ հոգի մի «մայր» շփավ—վիճակով ընտրած՝ որոշում են, թե
ո՞ր խումբը պիտի լինի հարձակվող և ո՞րը պաշտպանվող: Պաշտպանվողները նստում են մի
շրջանի մեջ և կարպետով ծածկվում: «Մայրը» նրանց շուրջը պտտվում է շաքար-բրդե պարանի
մի ծայրից բռնած, մյուս ծայրը նստողների ձեռքին է: Հարձակվողները լախտեալ աշխատում
են խփել նստածներին, իսկ «մայրը» քօ-քացի տալով աշխատում է դիպչել հարձակվողներին:
Եթե դիպավ՝ խմբերի դերերը փոխվում են: Հարձակվողները նստում են պաշտպանվողների տեղ,
իսկ սրանք դառնում են հարձակվողներ: Կրպարալախտի՝ առավելապես աղջիկների սիրած
խաղն է: Լախտի ուժեղ զարկում էին այդ կարպետին:

²⁸ Կրղէնգին՝ կաղ արմատից, թե՛ մեծերը և թե՛ փոքրերն են խաղում: Մեկը մի ոտքի վրա
թռչկոտում է, մյուսները նրա վրա հարձակվում և ձեռքով խփում: Եթե թռչկոտողը կարողանում
է ինքը ձեռքով մեկին խփել՝ խփվածն է կաղ-կաղ թռչկոտում և ուրիշներին հետապնդում: Արծ-
վանիկում այդ խաղը կոչվում է շրխկիլի՝ կաղ:

²⁹ Գորիսում:

³⁰ Արծվանիկում:

³¹ Հմմտ. СМОМПК, вып. XXV, отд. II, էջ 46: